



An Bhruiséil, 14 Nollaig 2022  
(OR. en)

16075/22

UD 285  
DELECT 231

## NÓTA CLÚDAIGH

---

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	14 Nollaig 2022
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	C(2022) 9254 final
Ábhar:	RIALACHÁN TARMLIGTHE (AE) .../... ÓN gCOIMISIÚN an 14.12.2022 lena leasaítear Rialachán Tarmligthe (AE) 2015/2446 a mhéid a bhaineann leis na féidearthachtaí chun dearbhuithe custaim a dhéanamh ó bhéal nó trí aon ghníomh eile a mheastar a bheith ina dhearbhuí custaim, le dearbhuithe a chur ó bhail i gcásanna sonracha agus le faisnéis a mhalartú maidir le dearbhuithe iontrála achomair

---

Gheobhaidh na toscaireachtaí i gceangal leis seo doiciméad C(2022) 9254 final.

Faoi iamh: C(2022) 9254 final



AN COIMISIÚN  
EORPACH

An Bhruiséal, 14.12.2022  
C(2022) 9254 final

**RIALACHÁN TARMLIGTHE (AE) .../... ÓN gCOIMISIÚN**

**an 14.12.2022**

**lena leasaítear Rialachán Tarmligthe (AE) 2015/2446 a mhéid a bhaineann leis na féidearthachtaí chun dearbhuithe custaim a dhéanamh ó bhéal nó trí aon ghníomh eile a mheastar a bheith ina dhearbhú custaim, le dearbhuithe a chur ó bhail i gcásanna sonracha agus le faisnéis a mhalartú maidir le dearbhuithe iontrála achomair**

(Téacs atá ábhartha maidir le LEE)

## MEABHRÁN MÍNIÚCHÁIN

### 1. COMHTHÉACS AN GHNÍMH THARMLIGTHE

Le Rialachán (AE) Uimh. 952/2013 ó Pharlaimint na hEorpa agus ón gComhairle an 9 Deireadh Fómhair 2013 lena leagtar síos Cód Custaim an Aontais (UCC), tarmligtear chuig an gCoimisiún an chumhacht chun eilimintí neamhriachtanacha áirithe de UCC a fhorlíonadh, i gcomhréir le hAirteagal 290 den Chonradh ar Fheidhmiú an Aontais Eorpaigh (CFAE). D'fheidhmigh an Coimisiún na cumhachtaí sin trí Rialachán Tarmligthe (AE) 2015/2446 ón gCoimisiún a ghlacadh an 28 Iúil 2015, Rialachán Tarmligthe lena bhforlíontar Rialachán (AE) Uimh. 952/2013 ó Pharlaimint na hEorpa agus ón gComhairle a mhéid a bhaineann le rialacha mionsonraithe maidir le forálacha áirithe de UCC.

Le Rialachán Tarmligthe (AE) 2015/2446 bunaítear forálacha a bhfuil feidhm ghinearálta leo chun UCC a fhorlíonadh d'fhonn a chur i bhfeidhm soiléir agus cuí UCC a áirithiú. Dá bhrí sin, ní mór é a thabhairt cothrom le dáta chun forbairtí sa reachtaíocht agus imscaradh chórais TF UCC a chur san áireamh agus chun cur i bhfeidhm foirmiúlachtaí custaim áirithe a shoiléiriú.

Is é is aidhm don Rialachán Tarmligthe leasaitheach seo rialacha áirithe sa Rialachán Tarmligthe atá ann cheana a thabhairt cothrom le dáta chun na forbairtí is déanaí a léiriú i ndáil le dearbhuithe iontrála achomair a chomhdú i gcomhthéacs eisiúintí 2 agus 3 de Chóras Rialaithe Allmhairí 2 UCC de chuid an Aontais (ICS2). Baineann an tabhairt cothrom le dáta sin go háirithe le soláthar sonraí dearbhaithe iontrála achomair a bheith sainordaitheach d'oibreoirí poist atá bunaithe i dtríú tíortha i gcásanna sonracha mura bhfuil na sonraí sin ar fáil do na hoibreoirí poist san Aontas ná don iompróir toisc nach ndéantar na hearraí a thrasloingsiú ach amháin i gcríoch chustaim an Aontais. Thairis sin, tugtar isteach leis an Rialachán seo an fhéidearthacht cead a thabhairt do dhaoine, go háirithe oibreoirí eacnamaíocha sa slabhra soláthair seachas an t-iompróir, codanna den fhaisnéis atá sna sonraí dearbhaithe iontrála achomair a sholáthar i gcomhthéacs an iompair d'iarrród, i gcomhréir le hAirteagal 127(6) de UCC.

Níl an fhéidearthacht ag oibreoirí eacnamaíocha atá bunaithe i gcríoch chustaim an Aontais dearbhú ó bhéal ná dearbhú trí aon ghníomh eile a dhéanamh chun pacáistíocht atá líonta a allmhairiú sa chríoch sin go sealadach agus é a ath-onnmhairiú, agus í líonta nó folamh. Ní féidir ach daoine atá bunaithe lasmuigh de chríoch chustaim an Aontais pacáistíocht a dhearbhuí ó bhéal nó trí aon ghníomh eile le haghaidh cead isteach sealadach nó lena n-ath-onnmhairiú, rud a chuireann oibreoirí an Aontais faoi mhíbhuntáiste. Leis an leasú seo beidh an fhéidearthacht ag oibreoirí an Aontais freisin foirmiúlachtaí custaim simplithe a úsáid maidir le pacáistíocht ionas nach mbeidh siad faoi mhíbhuntáiste a thuilleadh. Áireofar sa leasú seo an fhéidearthacht an t-éascú sin a chur i bhfeidhm maidir le pacáistíocht a allmhairítear agus í folamh.

Faoi reachtaíocht chustaim a bhí ann roimhe seo (Rialachán (CEE) Uimh. 2454/93 ón gCoimisiún an 2 Iúil 1993 lena leagtar síos forálacha maidir le cur chun feidhme Rialachán (CEE) Uimh. 2913/92 ón gComhairle lena mbunaítear Cód Custaim an Chomhphobail) d'fhéad údarais custaim dleachtanna custaim a aisíoc leis an dearbhóir/féichiúnaí i gcásanna sonracha nuair a rinneadh earraí a sheachadadh saor in aisce chuig eagraíochtaí carthanacha nó daonchairdiúla. Leis an leasú seo tabharfar an fhéidearthacht sin isteach arís.

## **2. COMHAIRLIÚCHÁIN ROIMH GHLACADH AN GHNÍMH**

Rinne an Coimisiún comhairliúchán i gcomhréir leis an gComhthuiscint idir Parlaimint na hEorpa, an Chomhairle agus an Coimisiún maidir le Gníomhartha Tarmligthe.

Bhí na Ballstáit agus gach páirtí leasmhar ábhartha eile rannpháirteach go cuí agus chuathas i gcomhairle leo go rialta maidir leis na dréachtforálacha.

Chuaigh an Coimisiún i gcomhairle leis na Ballstáit maidir leis an dréacht-téacs i gcrúinnithe rialta dá ghrúpa saineolaithe (an Sainghrúpa Custaim). Chuaigh sé i gcomhairle leis an bpobal gnó trína chomhlacht páirtithe leasmhara (Grúpa Teagmhála na Trádála (TCG)) sna cásanna seo a leanas:

- maidir leis na hAirteagail a bhaineann le dearbhuithe maidir le pacáistíocht, chuathas i gcomhairle le saineolaithe ó na Ballstáit ag cruinniú den Sainghrúpa Custaim agus an Rannóg um Nósanna Imeachta Speisialta an 23 Meitheamh 2022;
- maidir leis an leasú a bhaineann le dearbhuithe a chur ó bhail, chuathas i gcomhairle le saineolaithe ó na Ballstáit agus le TCG ag cruinniú comhpháirteach den Sainghrúpa Custaim agus an Rannóg um Foirmiúlachtaí Onnmhairiúcháin agus TCG an 30 Meitheamh 2022;
- maidir le leasuithe a bhaineann le ICS2, chuathas i gcomhairle leis an bpobal gnó ag cruinnithe leis na páirtithe leasmhara trádála lena mbaineann (le hoibreoirí iarnróid agus poist go príomha) agus ag cruinnithe le saineolaithe ó na Ballstáit ag an 47ú cruinniú den Sainghrúpa Custaim agus an Rannóg um an Reachtaíocht Ghinearálta Custaim an 30 Bealtaine 2022;
- Chuathas i gcomhairle le saineolaithe ó na Ballstáit agus le TCG ag an 48ú cruinniú den Sainghrúpa Custaim agus an Rannóg um an Reachtaíocht Ghinearálta Custaim a tionóladh go comhpháirteach le TCG an 11 Iúil 2022.

Rinne an Coimisiún breithniú cúramach ar na barúlacha ar fad a fuair sé le linn an chomhairliúcháin agus chuir sé san áireamh iad a mhéid ab fhéidir sa Ghníomh Tarmligthe atá beartaithe.

## **3. EILIMINTÍ DLÍ AN GHNÍMH THARMLIGTHE**

Is sa tarmligeán cumhachta dá bhforáiltear in Airteagail 131, 160 agus 175 de UCC atá bunús dlí an Rialacháin seo.

### **Prionsabal na comhréireachta**

Ó thaobh na comhréireachta de, urramaítear leis an Rialachán seo teorainneacha na gcumhachtuithe a dheonaigh na comhrechtóirí, agus ní bhaineann sé ach le gnéithe a bhfuil sé d'aidhm acu na forálacha dlíthiúla atá ann cheana a oiriúnú níos fearr do riachtanais na gcleachtas laethúil atá ag údaráis chustaim, oibreoirí eacnamaíocha agus daoine nach oibreoirí eacnamaíocha iad.

# RIALACHÁN TARMLIGTHE (AE) .../... ÓN gCOIMISIÚN

an 14.12.2022

**lena leasaítear Rialachán Tarmligthe (AE) 2015/2446 a mhéid a bhaineann leis na féidearthachtaí chun dearbhuithe custaim a dhéanamh ó bhéal nó trí aon ghníomh eile a mheastar a bheith ina dhearbhuí custaim, le dearbhuithe a chur ó bhail i gcásanna sonracha agus le faisnéis a mhalartú maidir le dearbhuithe iontrála achomair**

(Téacs atá ábhartha maidir le LEE)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) Uimh. 952/2013 ó Pharlaimint na hEorpa agus ón gComhairle an 9 Deireadh Fómhair 2013 lena leagtar síos Cód Custaim an Aontais<sup>1</sup>, agus go háirithe Airteagal 131, pointe (c) agus Airteagail 160 agus 175 de,

De bharr an mhéid seo a leanas:

- (1) Léirigh cur chun feidhme praiticiúil Rialachán (AE) 952/2013 ('an Cód') in éineacht le Rialachán Tarmligthe (AE) 2015/2446 ón gCoimisiún<sup>2</sup> go bhfuil gá le roinnt leasuithe ar an Rialachán Tarmligthe sin chun é a chur in oiriúint níos fearr do riachtanais oibreoirí eacnamaíocha agus údarás custaim agus chun na forbairtí maidir le himscaradh eisiúintí 2 agus 3 de Chóras Rialaithe Allmhairí 2 UCC (ICS2) atá le teacht a chur san áireamh.
- (2) Chun a shoiléiriú, i gcás coinsíneachtaí poist a thrasloingsítear san Aontas, gur ar an oibreoir poist i dtríú tír ónar seoladh na hearraí, i gcásanna áirithe, atá an oibleagáid maidir le sonraí dearbhaithe iontrála achomair a sholáthar, i gcomhréir le hAirteagal 127(6) de Rialachán (AE) 952/2013, is gá sainmhíniú nua ar 'oibreoir poist tríú tír' a thabhairt isteach.
- (3) Ón dáta a leagtar amach san Iarscríbhinn a ghabhann le Cinneadh Cur Chun Feidhme (AE) 2019/2151 ón gCoimisiún<sup>3</sup> maidir le himscaradh eisiúint 3 de ICS2, is féidir le daoine éagsúla a bhfuil baint acu leis an bpróiseas earraí a iompar isteach i gcóir chustaim an Aontais d'iarnród codanna den fhaisnéis de dhearbhuí iontrála achomair a chur isteach, is é sin le rá gur féidir comhaid iomadúla a chur isteach. Dá bhrí sin, ba cheart Airteagal 112a nua a chur le Rialachán Tarmligthe (AE) 2015/2446 chun foráil a dhéanamh maidir leis an bhféidearthacht sin.
- (4) Chun é a chur d'oibleagáid ar oibreoir poist tríú tír sonraí an dearbhaithe iontrála achomair le haghaidh earraí a thrasloingsítear i gcóir chustaim an Aontais a chur

<sup>1</sup> IO L 269, 10.10.2013, lch. 1.

<sup>2</sup> Rialachán Tarmligthe (AE) 2015/2446 ón gCoimisiún an 28 Iúil 2015 lena bhforlíontar Rialachán (AE) Uimh. 952/2013 ó Pharlaimint na hEorpa agus ón gComhairle a mhéid a bhaineann le rialacha mionsonraithe maidir le forálacha áirithe de Chód Custaim an Aontais (IO L 343, 29.12.2015, lch. 1).

<sup>3</sup> Cinneadh Cur Chun Feidhme (AE) 2019/2151 ón gCoimisiún an 13 Nollaig 2019 lena mbunaítear an clár oibre maidir leis na córais leictreonacha dá bhforáiltear i gCód Custaim an Aontais a fhorbairt agus a imscaradh (IO L 325, 16.12.2019, lch. 168).

isteach i gcás nach soláthraíonn an t-oibreoir poist sin na sonraí sin don iompróir, ba cheart Airteagal 113ú de Rialachán Tarmligthe 2015/2446 a leasú.

- (5) Maidir le pacáistíocht ar a bhfuil buan-mharcáil lena sainaitnítear duine; ar pacáistíocht í a allmhairítear agus iad líonta agus a ath-onnmhairítear agus iad líonta nó folamh, is féidir í a dhearbhu trí bhíthin dearbhú ó bhéal nó trí aon ghníomh eile dá dtagraítear in Airteagal 141 de Rialachán Tarmligthe (AE) 2015/2446. Ós rud é nach féidir sin a dhéanamh ach amháin i gcás pacáistíocht atá líonta a allmhairíonn daoine atá bunaithe lasmuigh de chríoch chustaim an Aontais, is gá síneadh a chur le cur i bhfeidhm na foirmiúlachta custaim simplithe sin maidir le pacáistíocht a allmhairíonn daoine agus í líonta gan beann ar an áit a bhfuil na daoine sin bunaithe.
- (6) Tabharfar isteach an fhéidearthacht an dleacht ar allmhairí a aisíoc i gcásanna sonracha ina ndéantar earraí a sheachadadh saor in aisce chuig eagraíochtaí carthanacha nó daonchairdiúla. Ba cheart é sin a dhéanamh trí chúis nua a chur leis na dearbhuithe custaim a chur ó bhail tar éis scaoileadh na n-earraí, rud a d'fhágfadh go bhféadfaí dleacht ar allmhairí a íocadh i gcomhréir le hAirteagal 116(1) den Chód a aisíoc.
- (7) Dá bhrí sin, ba cheart Rialachán Tarmligthe (AE) 2015/2446 a leasú dá réir sin,

TAR ÉIS AN RIALACHÁN SEO A GHLACADH:

#### *Airteagal 1*

Leasaítear Rialachán Tarmligthe (AE) 2015/2446 mar a leanas:

- (1) In Airteagal 1, cuirtear an sainmhíniú seo a leanas leis:  
'(54) ciallaíonn 'oibreoir poist tríú tír' oibreoir atá bunaithe i dtríú tír agus atá ainmnithe ag tríú tír chun seirbhísí idirnáisiúnta a rialaítear leis an gCoinbhinsiún Poist Uilechoiteann a sholáthar.';
- (2) i dTeideal IV, Caibidil 1, cuirtear an tAirteagal 112a seo a leanas isteach:

#### *'Airteagal 112a*

### **Soláthar sonraí an dearbhaithe iontrála achomair a dhéanann daoine eile i gcásanna sonracha a mhéid a bhaineann le hiompar d'iarnród**

(Airteagal 127(6) den Chód)

1. Más rud é, i gcás an iompair d'iarnród, go ndearna duine amháin nó níos mó seachas an t-iompróir, maidir leis na hearraí céanna, conradh iompair breise amháin nó níos mó a chumhdaítear le nóta coinsíneachta amháin nó níos mó a thabhairt i gcrích, agus nach gcuireann an duine a eisíonn an nóta coinsíneachta na sonraí is gá le haghaidh an dearbhairte iontrála achomair ar fáil dá pháirtí conarthach a eisíonn nóta coinsíneachta chuige nó dá pháirtí conarthach lenar thug sé socrú comhluchtaithe earraí i gcrích, is é an duine nach gcuireann na sonraí is gá ar fáil a sholáthróidh na sonraí sin d'oifig custaim na céadiontrála i gcomhréir le hAirteagal 127(6) den Chód.

I gcás nach gcuireann an coinsíní a léirítear sa nóta coinsíneachta nach bhfuil aon nóta coinsíneachta foluiteach aige na sonraí is gá le haghaidh an dearbhaithe iontrála

achomair ar fáil don duine a eisíonn an nóta coinsíneachta sin, cuirfidh sé na sonraí sin ar fáil d'oifig custaim na céadiontrála.

2. Go dtí an dáta a leagtar amach i gcomhréir leis an Iarscríbhinn a ghabhann le Cinneadh Cur Chun Feidhme (AE) 2019/2151 maidir le himscaradh eisiúint 3 den chóras dá dtagraítear in Airteagal 182(1) de Rialachán Cur Chun Feidhme (AE) 2015/2447, ní bheidh feidhm ag mír 1 den Airteagal seo.';

(3) In Airteagal 113a, cuirtear an mhír 4 seo a leanas leis:

'4. Ón dáta a leagtar amach i gcomhréir leis an Iarscríbhinn a ghabhann le Cinneadh Cur Chun Feidhme (AE) 2019/2151 maidir le himscaradh eisiúint 2 den chóras dá dtagraítear in Airteagal 182(1) de Rialachán Cur Chun Feidhme (AE) 2015/2447, i gcás nach gcuireann an t-oibreoir poist tríú tír na sonraí is gá le haghaidh an dearbhaithe iontrála achomair maidir le coinsíneachtaí poist ar fáil d'iompróir a bhfuil sé d'oibleagáid air an chuid atá fágtha de shonraí an dearbhaithe a thaisceadh tríd an gcóras sin, déanfaidh an t-oibreoir poist tríú tír sa tír seolta, má thrasloingsítear na hearraí tríd an Aontas, na sonraí sin a sholáthar d'oifig chustaim na céadiontrála i gcomhréir le hAirteagal 127(6) den Chód.';

(4) in Airteagal 136(1), cuirtear an méid seo a leanas in ionad pointe (j):

'(j) pacáistíocht a allmhairítear agus í líonta nó folamh, ar pacáistíocht í a bhfuil sé bearta í a ath-onnmhairiú agus í líonta nó folamh, ar a bhfuil buan-mharcálacha doscriosta lena sainaitheann duine atá bunaithe laistigh de chríoch custaim an Aontais nó lasmuigh de;';

(5) in Airteagal 138, cuirtear an méid seo a leanas in ionad pointe (c):

'(c) na hearraí dá dtagraítear in Airteagal 136(1), pointí (a) agus (j), den Rialachán seo lena ngabhann faoiseamh ó dhleacht ar allmhairí i gcomhréir le hAirteagal 203 den Chód;';

(6) in Airteagal 139, cuirtear an méid seo a leanas in ionad mhíreanna 1 agus 2:

'1. I gcás nach ndearbhófar iad ar mhodh eile, maidir leis na hearraí dá dtagraítear in Airteagal 136(1), pointí (a) go (d), (h), (i) agus (j), measfar iad a bheith dearbhaithe le haghaidh cead isteach sealadach i gcomhréir le hAirteagal 141.

2. I gcás nach ndearbhófar iad ar mhodh eile, maidir leis na hearraí dá dtagraítear in Airteagal 136(1), pointí (a) go (d), (h), (i) agus (j), measfar iad a bheith dearbhaithe lena n-ath-onnmhairiú i gcomhréir le hAirteagal 141 tráth a bheidh an nós imeachta um chead isteach sealadach curtha chun críche.';

(7) Leasaítear Airteagal 141, mír 1, mar a leanas:

(a) cuirtear an méid seo a leanas in ionad na habairte tosaigh:

'Maidir leis na hearraí dá dtagraítear in Airteagal 138, pointí (a) go (d) agus pointe (h), d'Airteagal 139 agus Airteagal 140(1), measfar aon cheann de na gníomhartha seo a leanas a bheith ina dhearbhuí custaim nó ina dhearbhuí ath-onnmhairithe;';

(b) i bpointe (d), cuirtear an méid seo a leanas in ionad phointí (iv) agus (v):

'(iv) i gcás ina meastar na hearraí dá dtagraítear in Airteagal 136(1), pointí (a) agus (j), den Rialachán seo a bheith dearbhaithe le haghaidh cead isteach sealadach i gcomhréir le hAirteagal 139(1) den Chód;

(v) i gcás ina dtabharfar na hearraí dá dtagraítear in Airteagal 136(1), pointí (a) agus (j), den Rialachán seo a chomhlíonann na coinníollacha a bhunaítear in Airteagal 203 den Chód go dtí críoch chustaim an Aontais i gcomhréir le hAirteagal 138, pointe (c), den Rialachán seo.’;

(8) in Airteagal 148(4), cuirtear isteach an pointe (f) seo a leanas leis:

‘(f) i gcás inar scaoileadh earraí i saorchúrsaíocht agus ina gcuirfear fianaise ar fáil chun sástacht na n-údarás custaim nár úsáideadh na hearraí ná nár caitheadh iad i gcríoch chustaim an Aontais ar choinníoll:

(i) go ndéantar an t-iarratas laistigh de bhliain amháin ón dáta a nglactar leis an dearbhú custaim;

(ii) gur tugadh na hearraí saor in aisce d’eagraíochtaí carthanacha nó daonchairdiúla a dhéanann a ngníomhaíochtaí i gcríoch chustaim an Aontais, agus, tráth a ghlactar leis an dearbhú custaim dá dtagraítear i bpointe (iii), go mbeadh na hearraí incháilithe le haghaidh faoiseamh ó dhleacht ar allmhairí dá scaoilfí i saorchúrsaíocht iad; agus

(iii) gur thaise na heagraíochtaí carthanacha nó daonchairdiúla sin dearbhú custaim maidir le scaoileadh i saorchúrsaíocht lena ngabhann faoiseamh iomlán ó dhleacht ar allmhairí i gcás na n-earraí atá i gceist, nó gur taisceadh dearbhú den sórt sin thar a gceann, faoin teorainn ama a leagtar amach i bpointe (i).’

#### *Airteagal 2*

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, 14.12.2022

*Thar ceann an Choimisiúin*  
*An tUachtarán*  
*Ursula VON DER LEYEN*